

吳卓羲 (Ron)、黃德斌及張建聲主演的電影《逃獄兄弟》系列「最終章」—《逃獄兄弟3》，今集加入陳豪飾演新任獄長，與眾人鬥智鬥力，阻止一場監獄逃亡大陰謀。日前 Ron、黃德斌及張建聲一起接受訪問，大談拍攝電影的趣事。期間阿 Ron 被問及緋聞女友菊梓喬 (Hana) 時仍三緘其口，但就不時被拍檔用此贈慶開玩笑，一樣睇頭十足。




■戲中多打鬥場面。

■吳卓羲在劇中大顯身手。

■吳卓羲避談菊梓喬。

《逃獄兄弟3》有默契一拍即合

# 吳卓羲拒談 Hana 準時收工去抹車



■吳卓羲、黃德斌、張建聲有講有笑。

連續三集都有份演出的德斌，指近年的港產片已很少有三部曲，他最想多謝導演，因自己從演以來都未試過在同系列三集電影中演同一個角色。戲中演監獄長的他，在上集已變了黑化的魔頭。德斌指這角色雖然幾好玩，但都很難演繹。阿 Ron 與張建聲即齊聲指這對他來說可謂手到拿來，德斌就謙稱：「都好難演。」影片幾乎全男班演出，加上已有默契，可說一拍即合，拍攝當然順利。張建聲說：「一埋位就順利拍攝，唔阻住拍檔返去做自己事。」近日與 Hana 的緋聞傳得正盛的 Ron，被笑問到可有阻他拍拖時？他即強調說：「冇，當時同時拍緊兩組戲，自己分配到，（感情明朗化？）冇咁講，我講分配到，係講親情，分配到時間同阿媽食飯，（女友呢？）唔講呢啲。」坐在旁邊的德斌和張建聲聽到阿 Ron 被追問到緋聞時，立刻起身彈開，十分搞笑。再問到阿 Ron 可會叫女友捧新戲場？他說：「邊個都好，自己買飛支持電影業，（可會一齊入場睇戲？）我自己都唔得閒睇，因為要拍攝。」此時坐番埋位的德斌與張建聲，被問到阿 Ron 可有把女友介紹給他們認識？張建聲即說：「我哋唔過問，我哋傾車，如果車係『老婆』，我哋就係成日交

換『老婆』。」阿 Ron 聞言即很大反應說：「嘩……大吉利是。」張建聲就爆阿 Ron 每日就算自己不洗澡，都要去抹車，所以開工不可超時。笑問到阿 Ron 架車是否只播 Hana 的歌，阿 Ron 即時呆了，不懂回答。當再追問到他拍這部戲期間 Hana 可有前來探班？阿 Ron 強調沒有。至於德斌就望着阿 Ron 笑說：「我都唔知邊個係你女友，等你 confirm（確定），你都有 confirm，（你唔敢講？）我真係唔知。」此時張建聲幫口解圍，指在片場除了有份演出的伍詠薇，都沒有異性出現。

## Ron 否認同居

雖然還未公開戀情，但近日有傳阿 Ron 與 Hana 已進展到在豪宅同居，阿 Ron 即否認在報道所講的地方同居：「查清楚先，（查什麼？）報道寫我住嗰度，我都唔係住嗰度，都冇同居，（可接受同居？）冇諗過，（可試過同居？）未試過，冇冇。」張建聲就贈慶說：「你都玩得人多，師兄。」

■黃德斌最想感謝導演。

## 頻收花期期待拍拖 陳靜鍾意被控制

陳靜 (DaDa) 昨為半個師弟謝高晉 (Ko) 新歌《謝絕關心》拍攝 MV，以低胸短裙上陣拍攝的 DaDa 表示心情十分緊張，因入行多年還是第二次拍 MV，對上一次已是十多年前，18 歲的時候，還有很久沒同異性有親密接觸。

DaDa 透露 MV 中要扮演一個有控制慾的女友，又會命令男友做親密行為，不用接吻，但會在天台跳舞。近年經常封胸的她，昨日一身性感打扮演出，她笑言都是配合件事。問到她本身又是否控制慾強的女友？DaDa 稱本身性格跟角色剛好相反，喜歡被控制多於控制別人。談到感情生活，近日頻頻收花的 DaDa 直言好期待拍拖，而擇偶條件一定要對方同樣鍾意做運動。



■陳靜低胸現身。

■劉雅麗稱有人小事化大。

劉雅麗父親劉山本（本叔）早前離世，劉雅麗及其母被其他家人指私吞帛金，沒夾錢辦喪禮及指她不是親生女，昨日劉雅麗回應指事件只是小風波，「係有啲誤會，佢要發到咁大，咪由得佢講，我已做咗做女嘅嘢。」問到何有為此不開心？她表示和媽咪有兩、三日唔開心，又指媽咪 EQ 比她叻。

對於被揭身世，她說：「我身世其實都好多人知，我無隱瞞，又唔係什麼秘密同唔見得人，一同出道已有人講過，大把人知道，毋須要再講一次。」她又指沒為此聯絡給錢辦本叔喪事的劉德華，因不想再騷擾到他，他是毫不知情的。

## 父親喪事鬧風波 劉雅麗稱已盡本分